

**Pemuda MIC Sokong BN Letak Calon MCA Di Kajang**  
**Bernama**  
**2 Feb, 2014**

KUALA LUMPUR, 2 Feb (Bernama) -- Pergerakan Pemuda MIC menyokong penuh agar calon MCA diletakkan sebagai wakil Barisan Nasional (BN) pada pilihan raya kecil Dewan Undangan Negeri (DUN) Kajang, Selangor, kata ketuanya C Sivarraajh.

Beliau berkata MCA wajar diberi ruang kerana parti itu kini melalui proses transformasi bersama kepimpinan baharu yang sesuai dengan kehendak rakyat terutamanya kaum Cina.

"Sebagai mengamalkan sikap setiakawan dalam gabungan Barisan Nasional, MIC komited sebulat suara menyokong penuh agar calon MCA diletakkan pada pilihan raya kecil ini," katanya dalam kenyataan di sini Ahad.

Dalam usaha memberi kemenangan kepada BN, beliau berkata sayap parti itu akan memberi fokus kepada golongan muda terutama dalam menerangkan isu-isu nasional serta situasi politik masa kini.

Kerusi DUN Kajang kosong selepas anggota DUN itu Lee Chin Cheh dari Parti Keadilan Rakyat (PKR) meletak jawatan pada 27 Jan lepas, dan pakatan pembangkang menamakan Ketua Pembangkang Datuk Seri Anwar Ibrahim sebagai calon mereka jika pilihan raya kecil diadakan.

Sivarraajh berkata Pemuda MIC melihat peletakan jawatan Lee tanpa sebab munasabah itu sebagai memperlekehkan kepercayaan yang telah diberikan pengundi kawasan tersebut kepadanya pada pilihan raya umum ke-13 Mei lepas.

Suruhanjaya Pilihan Raya (SPR) akan mengadakan mesyuarat khas untuk membincangkan perkara berkaitan kerusi DUN Kajang pada 5 Feb ini.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=1011606>